

## EVA

*(Eva entra mostrandosi infreddolita, ha le classiche foglie di fico, di cartone, parrucca bionda)*

Matruzza bedda lu friddu ca staiu acchiappannu ... “non ti preoccupari ‘a mughghieri è un veru paradisu appoi vidi...” e bravu a me maritu Adamu, iddu havi a scorcchia dura e friddu non ni senti iu cu sti foggghi di ficu u friddu ca ‘nsaccu non è cosa giusta... “è il ciclo delle stagioni ...” e daccordu: facisti u ciclu d’e staciuni? E allura fammi macari un cappottu di pelliccia no? E chi si fa accussi ca una povira cristiana sula o munnu hava agghiacciari ‘nto menzu di sta campagna? No! Nenti cappottu, nenti pilliccia, nenti bancarelli di robbi, e di boutique mancu a parrarini ... almenu si putissi scannari qualche visoni, qualche ermellinu ... ca tra l’altra su frischi frischi fatti e hana essiri tenniri tenniri: nenti! “l’animali non si toccunu picchi semu in paci cu tuttu u munnu” e allura dicci ca faceva sempri a stati no daccussi ca staiu addivintannu ‘mpezzu di ghiacciu ... ma si mi veni na prummunia ‘nsiccu e m’a quagghiu u vogghiu vidiri a ddu spertu di me maritu comu fa ... o trovila n’altra comu a mia ... na parola! Gia è impossibili truarini n’altra comu è ghiè ... ca ‘nta tuttu u munnu ci semu nuatri e dui suli ... ma di un latu mi piacissi accussi si ‘mpara. Oh, certu ca iddu u nomu bbonu ci u circiau: Adamu ... u sapiti chi voli diri? Fatto di terra: in altre parole pezzu di fangu! Ma ancora non haia caputu chi lu fici a fari o signor Adamu ... Vol diri: a casa non c’è mai “Adamu unni vai?” “A farimi na passata nto nostru giardinu” e bravu u signor Adamu ma n’o sai ca u nostru giardinu è granni quantu tuttu u munnu? Aora ca torna! Ma poi chi ci voleva, dicu, ‘nvintasti tuttu u munnu ca ‘nventimi macari u telefonu no? C aquali e quanno chiddu si ni va a furriari munnu munnu iu chi hciu a fari? Allura ‘nventimi a televisioni almenu... nenti. iu sula comu na babba ‘nto menzu d’u munnu ... ca a propositu ... vuatri, si vuatri ... gente del duemila ca ogni dui e tri mi friscunu ‘aricchi ... Porca eva di cca porca eva di dda ... ueh! E chi vi pasrsi? Viriti ca iu fimmina di casa sugnu, ... anche perchè ... macari quannu ciavissa vulutu ‘mpiccicari, non dicu assi, un curnittu tantittu a me marictu ... cu cu ci l’hava a fari m’u sapiti diri ca ‘nta tuttu u munnu semu nuatri e dui suli? E nautra vota abbadamu a comu parrati, chi stava dicennu? ah, me maritu ...E poi chi misteri bestia ca fa! Guardiano del creato .. e chi era na lenza di terra? Quantu iunci e s’u taliau tuttu u creatu ... “Adamu unni vai aoggi?” “Nenti a mughghieri non ti preoccupari, haiu un semplici incaricu, u completu e poi tornu” u sapiti chi è ca hava a fari? Darici u nomu a tutti ‘animali d’o munnu! Ora si! Quantu iunci e si passau tutti l’animali d’o munnu. Ca appoi dicu iu, non ni putevi fari chiù picca? No sempri all’esagerazioni! Ci n’è tanti ca mancu si ponu cuntari ... e vuatri ora ‘nto dumila ca circati di capiri com’è ca di na semplici cellula nisceru tutti st’animali ... ca quali chi ni sapiti ? ... Vol diri ni sfurnau ‘nta un ghiornu tanti e tanti ca sulu iddu sa fira a cuntalli. E du babbu di me maritu ca ci voli dari u nomu a tutti. Vi dicu a verità si è ca l’hava a fari iu ni faceva massimu na dicina di speci, chi sacciu chiddu ca ponu serviri veramenti: a iaddina u maiali a crapa ... a pecura no: picchi sti doppioni? a vacca, però chiù nicaredda e poi basta no ca ci n’è tanti ca sicuramente vuatri ‘nto dumila ca vi sintiti i patrui ancora mancu l’ata canuscitu tutti... Dicu fanni qualcunu di menu, no? Picchi ci ni sunu certuni ca iu ancora non haia caputu a chi servunu, ma pensu macari vuatri ... e vi ni dicu una ppi tutti: a chi servunu i zanzari? U viri ca non mi sapiti arrispunniri? Servunu a nenti dici tu? E a diri a verità non sacciu arrispunniri mancu iu, sulu dicu: i vo’ fari i zanzari? E va beni, falli, u patrui non si tu? Però almenu mentri fai i zanzari fammi macari u DDT no? E chi vi pari giustu ca i zanzari arrivaru subbitu i primi iorna e u DDT ancora hana a passari mila e mila anni prima ca u nventunu? E poi dda speci d’armaluni: i dinosauri: ma dicu iu chi è modu chissu? Sorta di bestii longhi vinti metri ca una s’hava scantari macari a nesciri di intra ... ddu babbu di me maritu u sapiti chi fici? “Cara oggi andiamo in campeggio in collina” e iu “Caro ma chi è ssu campeggio?” e iddu “Una cosa che ho inventato stamattina: ce ne andiamo in colina e andiamo a vivere in una capanna ...” e bravu u sceccu ... picchi tutti l’altri iorna unni è ca stamu? Picchi, dicu iu non m’invintavi na casa invece di invintari u campeggio? nenti ... partemu mi porta supra un muntarozzu e accumulencia a chiantari i pali ‘nterra ... lu spaventu ca mi pigghiai! A terra cumincia a trimari, si isa, nuatri arruzzulamu ‘nterra iu lu scantu “ u terremotu u terremotu!” e ‘nveci chi era? Ca ddu turduluni di me maritu hava iutu a chiantari u palu supra a carina di un dinosauru!

Talè cu st’animali non si ni po’ chiù ... non parramu appoi di ddautru diavulu di serpenti! Na cosa schifosa, all’altra vota iu era pe’ fatti me e iddu ca mi stunzuniava *(con voce acida e sussurrata)* “ emangiti stu pumu ... e mangiti stu pumu ...” iu ci pinsai ca d’arvulu era riservatu? No! e m’u mangiu ... e chi successi? L’ira di diu! Pinsati aca a me maritu, picchi puru iddu u tastau, ci arristau cca *(indica il pomo d’adamu)* ca ci fa’ sutta e supra e ancora non ci voli scinniri ... comunqui a diri a virità ci haiu macari u preiu d’a famiglia già avemu du’ masculiddi ... e chi stanu criscennu beddi ... certu iddu dici “riempite tutta la terra” ... alleggiu oh e chi ti para ca sugnu na fabbrica, alleggiu alleggiu viremu unni putemu arrivari ... Ma tutti e dui chi su’ bidditti ... u nicu è biondu, finu dilicatu ... si havuna ‘nvintatu i vistiti quann’era ranni ci puteva fari fari u modellu, beddu si n’ha veniri ... ma u ranni però mancu scherza ... forti, spertu beddu figghiu beddu figghiu daveru ... certu è ‘mpocu tostu a diri a virità ognio tantu si sciarria ccu so frati u nicu ... ma chi ci vuliti fari ... picciridi su’ ... *(da fuori si odono grida di bambini che bisticciano, Eva si gira verso le quinte ...)* E smettita, lassulu stari a to’ frati ... si un Cainu! lassulu stari ... e chi ci duni corpi di petra ‘ntesta? ... *(fa per scappare fuori si ferma rivolta al pubblico)* chissu ... si continua accussi ocche ghiornu a so frati u ‘mmazza! *(esce rimproverando il figlio...)*